

Investiziun en furmaziun – betg en betun



Carmelia Maissen ha success a l'urna cun projects d'infrastructura. Foto Livia Mauerhofer



La finamira è ambiziosa. Il nov bajetg da lain duai chaschunar netto nulla emissions da gas cun effect da serra. Visualisaziuns MAD

Claudia Cadruvi/FMR

Il chantun po cumenzar la primavaira 2025 a construir il nov edifiz per la protecziun civila en il Meiersboda. Cun 42 607 cunter 12 563 vuschs ha il suveran approvà dumengia passada l'edifiz che remplazza il bajetg dals onns settanta.

Puspè lubeschan ils votants e las votantas cun gronda majorità in edifiz dal chantun. Bundant 77% din GEA als 19 milliuns per il nov Center d'instrucziun Meiersboda che serva a la protecziun civila. Già l'onn passà han passa 80% dà il consentiment per la nova Scola auta spezializada dal Grischun. Carmelia Maissen, la ministra d'infrastructura dal Grischun, ha respundì la dumengia las dumondas da la FMR suenter che las vuschs èn stadas dumberadas ora.

FMR: Per la segunda giada entaifer gnanc dus onns dumagnais Vus atras a l'urna in project da blers milliuns francs. Tge è Voss recept da success?

Carmelia Maissen: Omadus projects èn stads investiziuns en la furmaziun – ina giada la scol'auta ed uss vai per la furmaziun da la protecziun civila. Tar questas infrastrukturas han ins pudì mussar che l'entira populaziun profitescha, pertge i n'èn betg investiziuns en

betun, mabain ellas promovon nossas forzas umanas en differents champs.

Tge pon ins far en l'avegnir en il nov bajetg dal Meiersboda che n'era fin uss betg pussaivel en il vegl?

Il bajetg ademplescha las medemas funcziuns sco il bajetg dad oz. Lez deriva dentant d'in temp che las metodos d'instrucziun eran autras. Il nov bajetg pussibilitescha ina instrucziun moderna, digitala e pli agila. L'entir manaschi lubescha process optimads. Il mantegniment è pli simpel ed ils custs d'energia sa reduceschan.

Vus essas architecta da professiun. Tge persuade Vus tar quest edifiz?

Il nov bajetg cumpletescha bain ils indrizz existents da la protecziun civila en il Meiersboda. Igl è in bajetg en lain – in material fitg intelligent che correspunda a las pretensiuns da construir ecologic. Ils planisaders han procurà che tut las cumparts dal lain vegnian utilisadas – ch'ins dovra tant sco pussaivel dal bist da la planta.

Era l'idea da l'economia circulara – da pensar a l'entir decurs da vita d'in bajetg fin ch'el vegn il davos spazzà – han ins integrà en la planisaziun. Talas chaussa m'han persuadi.

Avais Vus già in proxim grond project d'infrastructura ch'è sin rucca?

La glista è lunga. Ma per gronda part sa tracti da sanaziuns dad infrastructura existenta.

Nus avain ina retscha da bajetgs gronds dals onns settanta ed otganta che ston vegnir renovads, per exempel il bajetg da la polizia chantunala en la Ringstrasse a Cuira u la Scol'auta da pedagogia dal Grischun u il Museum da la natira. Quai na dat betg nova infrastruktura, mabain gronds projects da sanaziun. Ina infrastruktura nova è prevesida en il center regional a Samedan ch'è già pli daditg sin la glista. Ma i basegna anc tscherts pass da la planisaziun locala fin ch'ins po cuntinuar a planisar.



Uchia duess il nov edifiz per la protecziun civila en il Meiersboda vesair ora.